



Prome Minister Eman sosteniendo hobennan di Formacion Social na Rincon

Hobennan ta campando n'e parti mas pariba di nos isla

DIASABRA mainta pa algo despues di 6or di mainta, Prome Minister Mike Eman a yega na Rincon, den e area di Grapefield, caminda e grupo mas recien cu a drenta Formacion Social (Sociaal Vormingstraject) ta campando.

Prome Minister Eman a bin hunto cu esnan cu ta dirigi e programa pa haya un recorrido di tur e actividad y proyectonan cu e hobennan a trahando riba dje.

Esaki t'e di 7 grupo cu ta cuminsa e trayecto cu tin un duracion di 1 aña.

E trayecto ta cuminsa cu trainingnan intensivo di disciplina, team work y actividadnan fisico pa despues enfoca formacion di nan capacidad pa haya trabou via entre otro Enseñansa pa Empleo.

Prome Minister Eman a yega compaña pa Luitenant Texeira kende a lidera e proyecto aki pa algun aña caba.

Na nan yegada, e hobennan cu tin algun dia caba riba un Bivak, bou maneho di Luitenant Henriquez y Sargento Dijkhoff y nan asistentenan a para den formacion y canta 'Aruba Dushi Tera'.

Despues cu Prome Minister Eman a saluda nan, el duna nan tambe palabranan di sosten p'e dianan duro di trainingnan cu tin nan dilanti.

E trainingnan ta hopi intensivo e prome 3 simannan di e trayecto y ta enfoca riba encurasha fomenta abilidadnan importante pa cada un di e hobennan, manera respet, teamwork y actividadnan fisico.

E grupo aki ta particular pa motibo cu tin 4 hoben cu a yega di participa caba den e trayecto y na cierto momento a haye dificil pa sigui y a retira.

Pero nan tur ta hopi entusiasmo pa cuminsa di nobo, bisando cu e biah a tabata mas pa decision y cu anteriormente e tabata mas pa complacencia un miembro di nan famia y cu awor nan ta mira e importancia pa sigui y completa e trayecto.

Prome Minister Eman a wordo invita pa Sargento Dijkhoff pa participa na un training chikito tambe hunto cu e hobennan.

Prome Minister Eman hunto cu Luitenant Texeira a forma un team p'asina carga hunto un tronco y n'e mesun tempo jog den santo blanco, un actividad basta duro, pero Prome Minister Mike Eman a demostra di ta den bon forma fisico.

Na final di e dia, Prome Minister a haya un demostracion tambe di e tipo y cantidad di ekipo cu cada hoben tin.

N'e momento ey, Prome Minister Mike Eman a probecha un bes mas pa enfatisa n'e hobennan con importante e ta pa nan keda persevera y duna tur loke nan tin pa completa e trayecto importante aki.

E hobennan participando den e trayecto aki no ta na scol mas y no tin trabou. Hopi biah pa falta di disciplina y mal influencia, e hobennan aki ta keda den un margen social.

Formacion Social, un iniciativa di Gabinete Mike Eman I, ta ofrece e hobennan un cambio. Cu cooperacion cu Mariniers Kazerne, Arumil y Ministerio di Defensa di Reino, Gabinete Mike Eman for di 2011 a cuminsa cu e proyecto aki cu a yuda hopi hoben na forma nan mes pa un mihor futuro.

Un parti importante tambe di e trayecto ta unda ta siña e hoben con pa yega na haya trabou, con pa keda cu su trabou y duna tur loke nan por pa nan por progresa.

Prome Minister Mike Eman, na final di e bishita a bisa di ta hopi positivo di e hobennan cu a caba di drenta. Banda di cu nan entusiasmo ta halto, Prome Minister a splica cu esnan cu ta dirigi e programa a bin ta mehora e sistema pa evita cu hobennan no ta termina e trayecto.

E incidencia di hobennan cu no ta completa e trayecto a bin ta baha, pasobra ta inclui e famia hunto cu profesionalnan pa duna sosten ora cu un hoben no ta sinti cu e por sigui.

